



DEO OPTIMO MAX.

UNI ET TRINO,

VIRGINI DEI-PARÆ ET S. LUCÆ,

Orthodoxorum Medicorum Patrono.

BIJ Santé
Médecine
Paris

QUÆSTIO MEDICA

CARDINALITIIS DISPUTATIONIBUS

manè discutienda, in Scholis Medicorum, die Jovis decimâ mensis Martii, anno Domini M. DCC. LXXXV.

M. THIÉRY DE BUSSY, Consiliario Medico Regis ordinario in Senatu Parisiensi, Doctore Medico, Præside.

Utrum hodierna capillos componendi ratio sanitati minus conducat?

I.

ERITNE semper Opinio regina mundi? Hactenus frustra Philosophia sibi vindicat imperium; eâ derelictâ, illius partes sequuntur ipsi, qui sese sapientiores prædicant populi. Opinione quidem jubente, dum naturæ opera adornare, vel & etiam emendare gestit homo, ea nefandâ manu deturpat amens. Taceamus

enim ridicula cuti impressa stigmata & pigmenta, absurdasque aurium, palpebrarum, narium labiorumque depressiones, elongationes & perforationes: taceamus stolidam illam audaciam quâ barbaræ gentes calvariæ, nobilissimi organi arcis, vel templi, formam amant immutare: taceamus & superstitiosam testis unius apud hominum squalidissimos usurpatam avulsionem. Gallorum hujus ætatis, omni doctrinâ omnibusque artibus præclaræ, moribus attendamus. Hinc cachinnum movet pedum eleganter tenuium affectatio, quippe quâ permultos videas dolore voluptatem emere coactos, si forsitan illis choreæ, vel in ameno campo deambulatio arrideant: indè lugenda vel tenerrimorum cæca barbaries parentum, qui filiarum abdomen & pectus rigidioribus strictioribusque fasciis incarcerare audent: lugenda simul & execranda quarundam prægnantium foeminarum amentia, quæ quasi sanctissimi muneris ipsas puderet, susceptum opus pretiosissimum in discrimen adducere non dubitant. Verùm adversus ea irritis fere conatibus jam insurrexerunt Philosophi. Sed perinde ac si capillos componendi methodus hodierna sanitati prorsus indifferens esset; de eâ, forsitan ipsi opinioni obtemperantes, siluerunt. Liceat igitur illius incommoda, pro tenuitate nostrâ, arguere tentemus.

I I.

CAPILLUS è cute calvariam ambeunte, prodit origine nondum rectè cognitâ; quamvis permulti, nec mediocres quidem viri ad eam in apricum deducendam se accinxerint. Verùm multis scatent eorum scripta erroribus, ideò quod in pilorum humanorum descriptionem è structurâ apud brutas detectâ multa attulerint. Quæ igitur ipsimet percepimus, ea tantùm adducemus; sed ut minùs nos errasse quis putet, nonnullos illustres authores sæpè eadem ac nos vidisse ostendemus. E duplici loco oriri posse pilos *Ruifchius* (1) annotaverat, è telâ cellulosâ cuti subiectâ, necnon è cute ipsâ, quod confirmavit *Kaaw-Boerrhavius*. (2) Capillos autem è telâ cellulosâ omnes ortos scripserunt. Verùm ad occipitium præsertim frequentes tenues capillos reperiri, quorum radícula vix externam cutis superficiem attingeret, observavi. Duplex autem cum sit radiculæ origo, duplex etiam fabrica. Quæ cutim vix attingit radícula sphæricam refert figuram & pellucescit decolor. Ferè decolor etiam ab eâ ad externam epidermidis superficiem usquè tendens capilli portiuacula, quam membranacula circumdat. Etiam, cute maceratâ, capillum avulsum ea radícula sequitur. Memoratæ quidem illæ partes capillo nudo paulò molliores se præbent. Adiposam è contrâ telam subeunt radícula implicatiorem apparatus obtinet; sive enim capillus à

(1) *Epist. Prob. I, p. 8.*

(2) *Perisp. Hippocr. S. 311, 315.*

parte exteriori evellatur, five ordine inverſo, ereptâ cellulosa adipofâ, illius origo inquiretur, hæc ſunt deprehendenda: Capilli partem in tegumentis latentem veſtit vagina (1) cylindrica exteriori fine, orificio ſcilicet, conica: anguſtior etiam verſus fundum facta in hemiſphericam ovalemve deſinit figuram. Avuſſum ea pilum quandoque non ſequitur, quandoque cum capillo mediam tantum exteriorem ejus partem evelles, interiori remanente, utpotè quæ tenerior ſit. Corio quidem macerato, capillum ſemper deferit vagina. Pellucida ea cum ſit, facilè quam veſtit capilli portionem & ſedentem ejus in fundo radiculam percipere eſt. Saturatori capilli ipſius nudi colore intincta ut plurimum radícula rotundam tunc præ ſe fert figuram: pallidior è contrâ radicula proximè accedens capilli portiuncula. Duplici autem crederemus radiculam membranulâ obduci, interiori ſcilicet tenerrimâ & quaſi mucosâ, externâque paulò firmiori & vaginæ continuâ. Porro ſi denudetur capilli origo, quæ ſphærica videbatur radícula, tum evoluta, quaſi in conum irregularem abit; (2) cum haud rarò quâ parte capillo adhæret eo tenuiori facto aliquantulo ſit craſſior. Prorsus mollis ad apicem facta ſui ſæpius portiunculam in vaginulæ fundo linquit; undè, ni fallor, huic fundo remanet quid coloratum. Radiculæ medium obtinet cavitas, quæ conica intrâ capillum producitur & in canaliculum ſecundum illius longitudinem abit. Epidermidem in capillum reſecti, illique exterioris loco membranæ adnaſci authores benè multi ſcripſerunt; verùm, denudato abſterſoque pilo, fruſtrâ locum quo reſecteretur epidermis, ejuſque veſtigia hærerent quæſivimus. Quod ad ipſiusmet capilli fabricam attinet, reticularis ea nobis viſa eſt. Intenſum magis internâ ſubſtantiâ colorem cortex obtinet, obſcurioribuſque reticulatim diſtinguitur lineis quas pro vaſculis habuit *Senacus*. Villis exterioriùs munitum huncce corticem nonnulli dixerunt; eos quidem villorum loco fordes vidiffe alii contenderunt. Ut ut ſit, conſtat, æquali alternoque motu inter digitos preſſo fricatoque capillo, illius ſemper radicem progredi. Quod quidem illius conicæ figuræ ne tribuas, cum parum craſſitie perlongi capilli extremitates ambæ inter ſe differant. Fibrillas ab authoribus deſcriptas cortice connexas ut videremus nobis non tanta felicitas contigit. Capillorum apex quandoque ſinditur; indè ramosos quidam capillos dixerunt.

Quadruplicem in genere agnoſcimus capillorum colorem, album ſcilicet, flavum, ruſum & nigrum: ex hiſce variè nuptis facilè colores habeas omnes quibus diverſarum gentium comæ diſtinguntur. Ut plurimum in calidis regionibus nigerrimum colorem obtinent capilli, in temperatis caſtanearum æmulantem, in frigidis flavum, &, quod mirum poſſet videri, fuſco-nigrum frigidiffimo ſub climate. Generatim igitur nigredinem auget ſicca calidaque temperies; immixtâ è

(1) Winſlow, Expoſition Anat. Traité des Tégumens, N°. 99.

(2) Conicam & incurvam habet Malpighi, Oper. poſth. in fol. p. 93.

contrà flavedine, illam temperat humida & frigida: ità ut Borealiū populorum idèò fusco nigros esse capillos diceret, quod ob rigidum gelu sicciior sit quem spirant aër. Temperatis & frigidiusculis sub climatibus frequentiores rufi capilli, sub calidioribus & frigidissimis non infrequentes reperiuntur, licèt ibi nullas flavedine intinctas comas offendere sit. Canos autem fieri, senectute accedente, vel nigerrimos capillos nemo nescit. Verùm in calidissimis, tum Africæ; tum meridionalis Americæ plagis non rarò ex parentibus nigerrimis capillis cuteque obscurè fuscâ, vel & etiam nigerrimâ gaudentibus nascuntur alb. scentibus capillis pilisque aliis, cute pallidè albissimâ, iridibus sæpius rubris homines quos oculorum acies hebes, multa alia incommoda, mors demùm præmatura vitiosè conceptos arguunt. Sed & etiam temperatis in regionibus occurrunt quandoque homines quibus vix, ac ne vix quidem flavescit coma, debiles sunt oculi, rubent irides; (1) multò mitius cœterum à naturâ affecti quàm prædicti è nigris fuscis-ve orti parentibus. Rectissimi ut plurimùm frigidis in regionibus capilli, in calidioribus jam crispi sunt, ità ut in calidissimis quibusdam Asiæ & Africæ plagis parvos in cincinnos abeant, etiam mox memoratis nigris albis. Eò majori crassitie donantur capilli quò nigriores, nigris tamen tenuissimis:

III.

PER omnem vitæ curriculum capillos crescere vulgò notum. Si autèm, adhibitis pigmentis, tingantur; non longo elapso tempore, nova colore nativo gaudens portiuncula accrescit. Dum è contrà senili canitie, vel ut quandoque morbo evenit, aliâ coloris mutatione tentantur, (2) mutationem totus capillus subit. Capillum igitur novâ è radice prodeunte portione, crescere credas, credas & etiam eum non mortuum esse corpus. Tonso capite, citius recrescunt capilli. Frequenti verò celebratâ rasurâ, præsertim pueris fiunt nigriores. Ubi quidem sæpius pectine discriminantur, facilius eos crescere autememus, cum certam in longitudinem nigritarum coma pexa producat. Nondùm, licèt multi hanc sententiam foverint certa compertum est observatione nam humidum quid capilli

(1) Hujusmodi infantem quindecim mensibus natum, non nihil torosum, rubentibus quidem genis, patre 45, matre 24 annis, comâ nigrâ cuteque non nihil fuscâ distinctis ortam, se in unâ ex Acoribus Insulis *Tercer* dictâ vidisse mihi retulit *Cl. Renaud*, D. M. M. Similem etiam reperit anno proximè elapso puellam propè ferream vici *Chaillot* dicti portam, tenuium sorbillum venditoris (*d'un Limonadier*) filiam. Tredecimum ea agebat suæ ætatis annum, ei rubentes etiam genæ: pater verò fusco-flavis capillis gaudebat.

(2) E medicamento vehementissimo capilli nigri subito in fulvos mutati. *Journal de Trévoux*, 1703; & *Histoire de l'Académie Royale des Sciences*. Multa etiam vulgò adducuntur caniciei subito ingruentis exempla, è quibus quidem, (saltem si de mirandâ celeritate quâ accedere dicitur canities aliquid demas), animi pathemata præmaturam canitiem inferre posse deprehenditur. Canos è contrà robustissimi senis capillos versùs ejus septuagesimum annum pristinum nigrorem recuperasse legitur in *Hist. Acad. Reg. Scient.*

perspirent; verum humori excernendo eos aptos esse comprobat plica Polonica, quo in morbo fit ad eos metastasis quam verè criticam habeas cum, eâ obtentâ, primaria symptomata sedentur, quæ tonsis è contrâ capillis recrudescunt. Humorem etiam oleosum eos fundere facillimè colligas ex eo quòd reverâ pingues deprehendantur, lintea ipsis imposita fordescant coloreque fusco maculentur. Undè coloratum hocce oleum conjicias, eoque deficiente, canos fieri capillos, qui cani facti sicciores sunt.

Præterquam quod oleosum smegma capilli fundant, aliæ ipsis functiones, alius usus. Naturæ ad pernoscendos in singulis ipsius operibus fines eam interrogare quamvis ridiculum sæpius videatur; illam tamen crines capiti circumponendo sibi proposuisse arbitramur, ut nempe caput simul adornaret & ab externis noxis tueretur. At morosum audias Aristarchum, nihil incomptis capillis horridius esse contententem, nec cur caput potius quàm partes aliæ longis pilis donaretur nullam rationem posse afferri conclamantem. Sed illius rumores liceat unius affis estimemus. Horrida illi videtur incompta squallidaque coma: ad brutas respiciat pilum linguâ abstergentes, inconcinnandamque sciat homini à naturâ concessam comam non fuisse, cum illi pro instrumentorum suppellectili sublunaria corpora omnia adnascantur Cur longis pilis abundet caput non videt! Nobilitatem habitantis in calvariâ organi perpendat, perpendat & humani capitis structuram ac situm multoque majorem cranii partem homini patere videat, quam plerisque animantium. (1) Prolixos etiam attendat capillos in alas dorsumque descendere, quo loco parciior adeps, rarissimi plerisque viris pili, protegendumque, cui noxam valeret frigus inferre, debile sæpius organum, pulmonem nempe. Breves igitur capillos tantum videas nigritis, è calidissimâ mundi regione ortis. A Solis radiorum actione vividiori aëreque frigido calvariam defendunt crines; cui quidem officio exercendo egregiè sunt idonei; cum lenè admodum calorem concipiant, & semel conceptum nonnisi lentè dispergi sinant (2). Humiditatem etiam valent arcere, necnon perspirationem juvare, tum ab oleosum quo madent humorem, tum ob electricum motum quem facilè, vel leviori affricu, concipiunt. (3)

(1) Si caput hominis brutarum capiti attentè componas, duos hisce deprehendes superficiei calvariae trientes, collo, auribus, naribus, mandibulâque protegi. Etiamque plerisque similis, qui cynocephali sunt, dum è contrâ homini duo cranii trientes liberi sint cum perbreves habet nares, aures, maxillas, collumque inferiori ejus capitis loco adaptetur. Et quidem cujus caput hominis capiti proximè figurâ accedit, *Orang-outang* in Insulâ Java, *Bontio* referente, prolixis capillis distinctus occurrat.

(2) Corpora, ut vocant, *idioelectricâ*, inter quæ infimum pili locum non tenent, electrico motu ducendo parum idonei cum videantur, calorem etiam longè difficilius *eteroelectricis* seu *conductoribus* perducunt.

(3) Electrico motui concipiendo maximè aptos capillos experimentis comprobavit Cl. *Brytane*, *Journey through Sicilia*. XI *Lettre*. Verum nè quis electricitati medicæ nimium tribuens, vel ma-

CAPILLOS, calamistris admotis, torrere, nec haud levi quidem sine dolore apice arreptos, pectine versus caput ducto, repetitis ictibus crispare, varios in cincinnos & orbes variasque in texturas accommodare, disponere, dispositos ferreis plumbeis-ve filamentis connectere, strictis ut viris mos est ligamentis vincire, vel, ut foeminis placet, circa impositum vertici pulvinar adaptare, adscititiosque sæpius adjungere, dein adipibus, seu, ut vocant, pomatis variis odoramentis refertis ungere, demum amylo, vel aromaticis acrioribus, flavum cinereum-ve colorem referentibus conspergere summa est *comitricis* apud nos hodiernæ artis. Nunc quidem calamistrorum calore quamdam capilli labefieri partem obvium est, ita ut ampliùs transsudare nequeat pinguis humor, imò labes ad radicem usque producat. (1) Porro frontis præ aliorum locorum capillos calamistrare mos est, quod quidem eò absurdius, quò pars illa calvitiei magis obnoxia sit. Qui autem capillos violenter ut crispi evadant pexando dolor incutitur, necessariò humorum fluxionem capillatum versus corium advocat, sæpius igitur indè quædam quasi phlogosis ortum ducit, quæ aliquot per horas producat; ita ut non sine dolore partem premas. Ueberior eo loco facta perspiratio facillimè tunc vel levissimo frigore reperienda cephalalgiam, hemi-craniam, coryzam aliaque similia producere valebit. Dolorem etiam facit ad caput propiùs admotum vinculum; quod si strictius sit, capillos ipsos nimia pressione lædet. Ubi femina [pulvinaribus, adscititiis capillis, ferreis acubus aliisque id genus admotis, comæ molem nimis adaugent, præter timescendum capillorum defluvium, (2) caput defatigatur, fugatur somnus, præsertim apud delicatulas, quæ capitis dolore vel gravedine ut plurimum laborant. Verùm innocens-ne reputari valet adipum (3) amyli (4) acriumque aromatum usus? Rancidis enim factis

gueticarum nugarum factus præco, nostris abutatur dictis, nullam aliam actionem electrico capillorum motui me tribuere hic annotabo, nisi quæ dispergat humiditatem & sic apprimè perspirationem juvare queat. *Confer. Noller, Essai sur l'Electricité des Corps.*

(1) Heu mala vexatæ quanta tulere comæ!

Quam sese præbuerant ferro patienter & igni;

Ut fieret torto flexilis in orbe sinus!

Clamabam: scelus est, istos scelus urere crines.

Sponte decent: capiti, ferrea, parce tuo:

Vim procul hinc remove. Non est qui debeat uri,

Erudit admodas ipse capillus acus.

Formosæ periére comæ.

Ovid. Eleg. 4, l. 1 Amor.

(2) Quæque caput passim cumulatam crinibus augeat,
Turpè gerent nudo vertice calvitie.

(3) Adipibus tamen contrà capillorum defluvium uti conducit. Verùm priusquam novum adipem addas, abstergendus est, qui jam illius fuit capillus. Inter adipem anteponeendi sunt qui fluidiores & lentius rancescunt, ut carnivororum animalium. Meritò igitur Ursinus commendatur.

(4) Amylum linteos eo obductos erodere annotat Ramazzini de Morbis art. c. xxii. Addendum

adipibus, aromatum acredine amylique erodente vi nonne vellicari debet cutis, indè pruritus, capitis anxietas, minùs quietus somnus. Prædictis fordibus etiam cum oleoso capillorum humore mixtis cuti quasi unguen adnascitur. Id autem si reverâ perspirationi insensibili poros obliniendo non impedimento sit; saltèm, qui puris è capillis facilè defluxisset & in auras vaporasset, sudorem ad cutim retinet, ita ut, frigefacto illo sudore, subita calenti capiti refrigeratio inferatur. Sed & etiam sordes illæ naturalem capillorum vim electricam minuunt quam perspirationi vidimus feliciter conducere. Demùm dum sparguntur pulveres, illarum quædam pars volitando pulmones ingreditur; quam innoxiam non debes habere: debilibus enim pulmonibus dyspnæam, fugacem reverâ, subito facit, necnon observatione constat asthmæ, peripneumonix tabique pulmonali præ aliis obnoxios esse pexatores.

V.

VERUM quid ad componendos capillos varia adhibita artificia nociva habeas, qui mox capillos ornamentum capiti à naturâ concessum contendebas, opponit *Zoïlus*? Non vinctes, *Zoïle*? non enim compositionem, illius abusum respuo. Calamistram, quæso, amylos, acres aromatici pulveres ceteraque decenti ne erunt capillorum compositioni necessaria? Longè quidem; cui bono enim nativum colorem fuco deturpare audeas? Albam cutim florentesque genas nonne jucundè distinguit nigrum supercilium; cur igitur & corvinâ nigredine nitens coma noceret? Etiam ad fuscedinem vergat cutis color; si album flavum ve admoveas pulverem, vel illius coloris oppositione, vel hujus diffusionem fuscedo conspiciua magis evadet. Qui quidem castanearum colori color est æquiparandus dulcem jungit cum candido fronte pugnam, dulcissimam cum niveâ cute vix flavescens coma. Nec est cur croceo aureo-ve splendore nimis divitem cæsariem gestias fucare: pulcherrimam memineris croceis fuisse capillis Auroram, novumque roseas in genas similibus è capillis lucem reflecti. Capillorum canitiem celare audes! Non times debitam senectuti reverentiam proinde denegandam? At, omissa pulvere, squallida coma videbitur. Ne quidem, si pectinis dente quotidie discriminatam aquâ purâ madente spongiâ abstergendam, linteisque dein exsiccamdam cures. (1) Sic nitidi facti jucundo splendent decore. In orbem eos ducere placet; ante somnum laxius volvantur, volutique per noctem maneant, & eos in cincinnos abeuntes aurora videbit. Perlongi sunt; molliter textorum extremitates

capillos è capite frequenter amylo consperso depromptos nimis exsuccos esse quam ut ad capillamenta texenda adhibeantur. Furfuraceas herpes etiam fronti sæpius inducit amylos.

(1) Quem quidem agendi rationem natura brutas edocuit; cum linguâ vel pedibus salivâ irroratis pilos abstergant. Ceterum ea methodo perspiratio fit vividior & caput etiam contrâ frigoris impressiones munitur. Vide *C. Celsum*, Lib. 1, c. 4.

coërceat vitta. (1) Verum fœminis tantum similes curæ, fatis sit si pueros & rectè pe os habeant capillos viri, quibus tum ingēni, tum corporis masculum robur fo mæ decori multò præstantius venit ornamentum. Bellulis igitur exquisitum comæ cultum linquant, bellulis istis hesternâ languidioribus rosâ, vel, ut jocosè cecinit Poetarum lepissimus, mollioribus

cuniculi capillo

Vel anseris medullulâ vel imulâ oricillâ,

Vel, &c.

His quidem etiam & amyllum, calamistram, aromata ceteraque ejusdem farinæ per me liceant; dum nihil mirum sit, si pulchritudinem sanitati propriam emptitiæ suæ bellitudini postponent.

Ergo hodierna capillos componendi ratio sanitati minùs conducit.

(1)

Non sint sine lege capilli.
Admotæ formam dantque negantque manus.
Nec genus ornatûs unum est: quod quamque decebit,
Eligat, & speculum consulat antè suum.
Longa probat facies capitis discrimina puri:
Sic erat ornatis Laodamia comis.
Exiguum summâ nodum sibi fronte relinqui,
Ut pateant aures, ora rotunda volunt.
Aterius crines humero jactentur utroque:
Talis est assumpta, Phœbe canore, lyra:
Altera succinctæ religetur more Dianæ,
Ut solet, attonitas cum petit illa feras.
Huic decet inflatos laxè jacuisse capillos.
Illa sit adstrictis impedienda comis.
Hanc placet ornari testitudine Cyllenea:
Sustineat similes fluctibus illa sinus.
.....
Et neglecta decet multas coma. Sapè jacere
Hesternam credas; illa repexa modo est.
Ars casum simulat.

Ovid. Artis amat. Lib. III.

Proponebat Parisiis BERNARDUS - NICOLAUS PLUUNET., Parisinus,
Universitatis Medicinæ Monspeliensis, Doctor, necnon Saluberrimæ
Facultatis Medicinæ Parisiensis Baccalaureus, Theses Author.
A. R. S. H. 1785.

AB OCTAVA AD MERIDIEM.

Typis QUILLAU, Universitatis & Facultatis Medicinæ Typographi. 1785.

